

मार्निंग डोगरी न्यूज़ बुलेटिन, समें. 09.20 Hrs

<><><><><><>

Headlines

1. प्रधानमंत्री नरेंद्र मोदी होरें आखेआ ऐ जे भारत गी तरक्की दी बतै पर तेजिया कन्नै अगड़े बधने ते नमे कीर्तिमान स्थापित करने कोला कोई रोकी नेई सकदा।
2. जम्मू-कश्मीर प्रधानमंत्री मुद्रा योजना दा पूरा लाह हासल करने च अव्वल नम्बर दा प्रदेश बनेआ।
3. गृह मंत्री अमित शाह होरें जम्मू-कश्मीर दे सुरक्षा हालात दा जायजा लैता ते आतंकी वारदातें च कमी लेई सुरक्षा एजेंसिएं दी सराहना कीती।
4. जम्मू-कश्मीर सरकार सरकारी ज़िमीएँ परा नज़ैज कब्जे हटाने लेई सख्त उपाऽ करै करदी ऐ।
5. सरकारै साफ कीता ऐ जे करसान दोआर कार्ड तैहत लैते गेदे 3 लख रुपे तगर दे कर्जे माफ करने बारै कोई प्रस्ताव नेई ऐ।
हून खबरें दी तफसील कन्नै विजय बजाज।

<><><><><><>

PM Modi Waqf

प्रधानमंत्री नरेंद्र मोदी होरें आखेआ ऐ जे संसद च वक्फ संशोधन बिल दा पास होना समाजी न्याऽ दी दिशा च पुट्टी गेदी मते महत्वै आहली गैहू ऐ। मुसलमानें सने सब्बनें समुदायें दे हितें दी राखी आहला इक शानदार कनून बनाने लेई संसद गी मुबारकबाद दिंदे होई प्रधानमंत्री होरें आखेआ जे वक्फ दी पवित्रता हून संरक्षित होग ते महिलाएं, बच्चें ते कमजोर लोकें दे अधिकारें दी हिफाजत जकीनी बनोग। प्रधानमंत्री होर जंदी रातीं दिल्ली च इक निजी मीडिया समूह आसेआ आयोजित कार्यक्रम गी संबोधित करै करदे हे। उनें आखेआ जे 2025 बरे दे पैहले 100 दिनें दरान सरकारै ना छड़े फैसले लैत्ते न, सगुआं भविष्य लेई इक मजबूत नीह बी रक्खी ऐ। श्री मोदी होरें आखेआ जे पिछले 100 दिनें दिआं उपलब्धियां एह दर्शादियां न जे भारत गी हून कोई रोकी नेई सकदा ते भारत तरक्की ते नमी उपलब्धियां हासल करने दी बतै पर तेजिया कन्नै अगड़े बधै करदा ऐ।

<><><><><><>

Mudra-Yojana

प्रधानमंत्री मुद्रा योजना दा जम्मू-कश्मीर पर बी खरा मता प्रभाऽ पेदा ऐ। पिछले 10एं बरें थमां चला'रदी इस योजना दे तैहत भलेआं लौहके ते लौहके उद्यमें गी 20 लख रपे तोड़ी दे दोआर-कर्जे उपलब्ध करोआए जंदे न। इस सरबंध्यै च किश लाभार्थिएं आकाशवाणी समाचार कन्नै अपने विचार सांझे कीते।

<><><><><><>

PM Mudra Yojana

अप्रैल 2015 च शुरू कीती गेदी प्रधानमंत्री मुद्रा योजना नै अज्ज दस बरे पूरे करी लैते न। इस योजना दे 10 बरे पूरे होने पर अज्ज प्रधानमंत्री नरेंद्र मोदी होरें अपने आवास पर योजना दे लाभार्थियें कन्नै गल्लबात कीती। श्री मोदी होरें लाभार्थियें गी मुबारक दिंदे होई इस गल्लै पर जोर दित्ता जे कियां इस योजना नै सुखने गी हकीकत च बदली दित्ता ऐ। उनें दस्सेआ जे 33 लख करोड़ रपे कोला मते पैहे गी बगैर कुसै गारंटी दे बंडुआ गेआ ऐ। प्रधानमंत्री होरें नौजवानें गी नौकरी तुप्पने आहलें दे बजाय आत्मनिर्भर रोजगार पैदा करने आहलें च तब्दील करने च योजना दी भूमिका पर बी जोर दित्ता।

<><><><><><>

Home-Minister

केंद्री गृह मंत्री अमित शाह होरें सुरक्षा एजेंसिएं गी निर्देश दित्ता ऐ जे जम्मू-कश्मीर च आतंकवाद दा भलेआं खात्मा करने लेई आपूं च नेडमा तालमेल बनाइयै ते निगरानी बधाइयै आतंकवाद रोधी कम्म-कारवाइएं च तेजी आंदी जा। अपने 3 दिनें दे जम्मू-कश्मीर दौरे दे खीरले रोज कल श्रीनगर च इक महत्वपूर्ण सुरक्षा बैठक दी अध्यक्षता करदे होई अमित शाह होरें आखेआ जे नरेंद्र मोदी सरकार दिएं बहुमुखी सुरक्षा नीतिएं, जम्मू-कश्मीर च आतंकवाद गी अहमोआ करी दित्ते दा ऐ ते तौले गै एहदा समूलचा नाश करी दित्ता जाग। गृह मंत्री होरें घुसपैठ, नौजवानें ते आतंकवाद च शामिल होने ते आतंकवादी घटनाएं च कमी आहने च सुरक्षा एजेंसिएं दे जत्ते दी मती सराहना कीती। उनें जोर देइयै आखेआ जे प्रधानमंत्री मोदी हुंदे नेतृत्व च असें आतंकवाद गी दना बर्दाश्त नेई करने दी नीति अपनाई ऐ। मंत्री होरें सबबनें सुरक्षा एजेंसिएं गी आपूं च नेडमा तालमेल बनाइयै कम्म करने लेई आखेआ तां जे दफा 370 ढाए जाने दे बाद हासल उपलब्धिएं दा लाहू लोके गी थोए ते आतंकवाद मुक्त जम्मू-कश्मीर दा लक्ष्य तौले शा तौले हासल कीता जाई सकै।

<><><><><><>

Wheat-Procurement

हाड़ी रूतै लेई कनक दी खुश-खरीद गितै बंदोबस्तें गी मुक्कदा रूप देने दे मकसद कन्नै कल इक बैठक लाई गई। राई-बाई मैहकमे दे डरैक्टर अरविंद्र सिंह रीन होरें कनक दी खुश-खरीद आहली प्रक्रिया गी चुस्त-दुरूसत बनाने दी जरूरतै पर जोर पांदे होई भारती खाद्य निगम एफ.सी.आई आसेआ डी.बी.टी सरिस्ते राहें करसानें थमां सिद्दी खुश-खरीद दे कम्में गी बवस्थित बनाने लेई आखेआ। इस मौके पर ऐलान कीता गेआ जे जम्मू संभाग च कनक दी खुश-खरीद आहली 21 मंडियां स्थापित कीतिआं जांगन जिंदे चा जम्मू जिले च 11, कठुआ च 9 ते साम्बा च 1 मंडी होग।

<><><><><><>

ते हुन बाकि दिएं खबरें कन्नै जगमोहन शर्मा।

KCC-Loans

जम्मू-कश्मीर सरकारै जंदे रोज एहू गल्ल साफ करी दिती ऐ जे करसानें आसेआ लैते गेदे 3 लक्ख रुपें तगर दे किसान क्रेडिट कार्ड कर्जे गी माफ करने दी कोई बी तजवीज जेरे-गौर नेई ऐ। आकाशवाणी दे जम्मू संवाददाता दी रिपोर्ट मूजब सरबन्धित मैहकमे दे मंत्री होरें विधायक हिलाल अकबर लोन हुंदे आसेआ पुच्छे गेदे इक सोआलै पर प्रतिक्रिया दिंदे होई एहू गल्ल आक्खी। ध्यानजोग ऐ जे बक्ख-बक्ख सरबन्धत पक्खें आसेआ जम्मू-कश्मीर प्रशासन गी एहू गुजारश कीती जा'रदी ऐ जे किसान क्रेडिट कार्ड तैहत करसानें आसेआ लैते गेदे दोआर-कर्जे गी माफ करियै उनेंगी बिंद राहत दिती जाहग।

◁ ▷ ◁ ▷ ◁ ▷ ◁ ▷ ◁ ▷ ◁ ▷

State Land Encroachment

जम्मू-कश्मीर सरकार दा आखना ऐ जे केंद्र शासित प्रदेश च 4 लक्ख 28 ज्हार 204 कनाल ते 13 मरले सरकारी ते घाह चराई आहली जिमी पर गैर कनूनी कब्जे न। आकाशवाणी दे जम्मू संवाददाता नै जानकारी दिती ऐ जे विधानसभा च विधायक फारूक अहमद शाह हुंदे आसेआ पुट्टे गेदे इक सोआलै दे परते च मतल्लका मंत्री होरें जानकारी दिती जे सरकारै गैर कनूनी कब्जे खाली कराने लेई सख्त गैई पुट्टिआं न जे इस चाल्ली दे नाएं दे सारे इंद्राज रह करी दित्ते गेन। मंत्री होरें दस्सेआ जे कब्जे खाली कराने लेई कारवाइयां बरोबर जारी न। उनें अगगे दस्सेआ जे 3 ज्हार 555 मामले च जिमी दे इस्तेमाल च बदलाव आहली मंजूरी बी देई दिती गेई ऐ जियां जे रिहाइश लेई, कारोबार जां फी औद्योगिक इस्तेमाल लेई।

<><><><><><>

Nathatop Climate Centre

हिमालयाई खेत्तर च इक कुल संसारी सतह दी पैहल दे तौरा पर केंद्री विज्ञान मंत्री डॉ. जितेंद्र सिंह होरें अज्ज उधमपुर जिले दी चनैनी इलाके दी नत्थाटॉप थाहर उच्चाई आहले इलाके दे पैहले-पैहले जलवायु केंद्र दी शुरूआत कीती। इस पैहल दा मकसद मती उच्चाई आहले इलाके च अध्ययन ते अनुसंधान दे कन्नोकन्नी मौसम दे बारै च सटीक जानकारी उपलब्ध कराना ऐ। इस बारै आकाशवाणी कन्नै गल्ल करदे होई डॉ. जितेंद्र सिंह होरें आखेआ।

<><><><><><>

Udhampur-K.P Summary Revision

27 नवंबर बड़गाम विधानसभा हल्के गितै मतदाता सूचिएं दी विशेष नजरसानी बारै भारतीय चुनाव आयोग आसेआ जारी निर्देशें दी पालमा करदे होई कल उधमपुर च विस्थापितें सरबन्धी असिस्टेंट कमिशनर हुंदे दफ्तरै च सब्बनें सियासी पार्टिएं दी इक बैठक सद्दी गेई जेदे च बक्ख-बक्ख पार्टिएं दे प्रतिनिधि शामिल होए। मीटिंगै च जानकारी दिती गेई जे इस हल्के दिए मतदाता सूचिएं दी नजरसानी दा कम्म पैहली अप्रैल 2025 गी क्वालीफाइंग डेट मन्नदे होई कीता जाग यानि पैहली अप्रैल 2025 गी आधार मन्नदे होई मतदाता दी उम्र, पता, योग्यता, रिहाइश ते इस चाल्ली दी होर जानकारी गी मतदाता सूचिएं च शामिल कीता जाग। इस बारै कोई बदलाव, सुधार, ना जोड़ने, कटाने वगैरा गी लेइयै दावे ते एतराज 24 अप्रैल 2025 कोला पैहले दर्ज कराए जाई सकदे न ते होर मती जानकारी लेई बी.एल.ओ उधमपुर कन्नै 94192-70203 नम्बर पर राबता कीता जाई सकदा ऐ।

<><><><><><>

Read by: Vijay Bajaj and Jagmohan Sharma

Composed By : Varinder Kumar

Editor : Mustkeem Baig